

## DUCJ SOT DE SFILZADE CUNTUN BEL LIBRI

Mê mari mi dîs simpri che je mi leieve une vore di storiis, prin di lâ a durmî, cuant che jo e gno fradi o jerin piçui. Dutis lis seris e vignive e nus leieve une storie.

Mi visi une vore ben di un libri che mi veve pardabon stufât: ancjemò chel libri?! Vonde! Lu sai a memorie! Butilu vie! Regalilu! Dismenteilu di cualchi bande! Ma il libri al è ancjemò li cumò, mê mari no bute vie nuie.

**No sai se chel libri al veve stufât ancje mê mari: magari sì, ma e faseve fente di nuie? O pûr no saveve che al bastave lâ intune biblioteche par cjatâ libris a sbreghebalon.**

Forsit se no mi visi nuie al è parcè che mi indurmidivi subit, o forsit parcè che o scoltavi lis peraulis e mi immaginavi la storie cussi tant che mi visi dome di chel mus cu la schene plene di sâl grues, che al colave tal flum ma si salvave, par vie che il sâl grues si disfave e il mus al tornave parsore aghe subit. O pûr mi visi de cjavru mangjade dal leon, ancje se no veve colpe di nuie, ma il leon al veve tante fam, la fam dal leon.



po! E mi visi dal corvat che al cjantave sù pal arbul, ma cuant che la bolp i contave bausiis e lui al vierzeve il bec-mone! - al pierdeve il toc di formadi.



Mi visi soledut dal **crocodil** taponât che al vaive, lis lagrimutis che a colavin dai voi picinins, i voi dai madrats, cu la pupile drete. E jo o pensavi: "Eh no ve! Masse facil vaî cumò! Prin tu âs pûr mangjât l'om, cumò tu vais". Chel crocodil si mi visi mi faseve pôre. Alore mi taponavi sot de sfilzade e chest al è il prin consei: simpri vè une sfilzade dongje, cuant che si scoltin storiis, soledut cumò che e torne la stagjon dal frêt. Alore, ve ca la liste dai miei conseis par gjoldi la leture:

1. cjatâ un biel puest
2. cjatâ un biel libri
3. cumbinâ une bieles compagnie
4. cun dute la calme cjatâ une bieles storie
5. leile a chei altris

Michele Polo

Michele Polo al è buratinâr e al colabore cul progjet "Nassûts par lei - Brie di conte, don di lenghe", cors par gjenitôrs, nonos o fradis che a àn voie di imparâ a lei ben. Par iscrivisi: [www.ertfvg.it](http://www.ertfvg.it)

## Rispuint come Proust



Non  
Eva

Etât

7 agns

Dulà sêstu a stâ

Udin

Ce ti plasial de tô citât/dal to pais

La mê palestine de ASU

Ce no ti plasial de tô citât/dal to pais

Il cacan dai gjans par strade

Miôr ami o amie

Une vore di frutis!

Il to difiet

Un tic permalose

Il difiet dai tiei gjenitôrs?

A cridin

La ultime volte che tu âs vaiût

Vinars o sei colade a scuele

Lis vacancis plui divertentis

In Scozie

Il colôr che ti plâs di plui

Viole

Il nemâl che ti plâs di plui

Cjan

Ce robe ti avilissie

Un film brut

Ce no ti plasial fâ

La mignestre di fasûi

Ce ti fasial pôre

Stâ a cjase di bessole

Ce volaressistu fâ di grande/grant

La giornaliste

Il libri o film che ti à plasût di plui

Amarcord di Fellini

I nons che ti plasin di plui

Camilla

Robe di bevi preferide

Te

Robe di mangjâ che ti plâs di plui

Paste cul ragu

Personaç preferit/preferide

Barbie

Il to pipinot

Un cubin de Scozie

## LA FILASTROCJE

### ANIN A NOLIS

Anin, anin a nolis  
dulà che al duar il lôf.  
Lu cjaparìn pe code,  
lu metarin tal cjôt.




### CE ISAL?

O ai une scjatule di pierutis, dutis rossis,  
dutis finis, dutis bielis e di un colôr: cui  
che al induvine al è un dotôr.  
La rispueste tal prossim numar.



## UNE RIDUÇADE...



La mestre i domande a Jacum: "Jo mi lavi, tu tu ti lavis, lui si lave, noaltris si lavin, voaltris si lavais, lôr si lavin... Jacum ce timp isal?". E Jacum: "Domenie, siore mestre!"

### AHHH! LA RISPUESTE DAL NUMAR STÂT

Il cuart di lune



## PIRON È SEDON



### Il frico di formadi: un classic!

Ce covential par mangjâ in 4:

400 gr di formadi gratât  
50 gr di farine di polente  
un pôc di vueli



No 'nd è taule in dut il Friûl dulà che no si cjate il frico... par fuarce, al è tant bon che mai!

La prime domande però e je "Ce formadi si aie di doprâ?".

Come tancj plats furlans il frico al è nassût par finî il formadi che al restave ator e dal sigûr no si doprave chel plui bon. Vuê in tancj lu fasin cul Montasio, ma disin che l'impurtant al è doprâ un formadi vecjo di almancul 10 mès.



Par capîsi: se tu dopris la mozzarella al è sigûr che il frico no ti ven! 😊

Intun cjadin messede il formadi cu la farine di polente.



Scjalde une padielute antiaderente cuntun pôc di vueli dentri, juste un got mi racomandi. Sielç une padiele buine, se no il formadi si tache dut e il frico nol ven ben.

Met un pâr di sedons di formadi te padiele, cuvierzile dute ben di mût che ti vegni un biel cerchi.



Cuant che il formadi al tache a disfâsi zire il frico doprant une palette e stant une vore atent a no scotâti. Va ben planc parcè che nol à di fruçâsi, ma di restâ taront.



Cueilu ancje di chê altre bande fin che al devente biel zâl come il SORELI. No masse però se no al ven amâr!

Il prin frico al è pront, va indevant cussi fin cuant che al finis il formadi dal cjadin.



Ma nô furlans o sin golôs e un frico no nus baste, e alore la setemane che e ven o imparin a fâ chel cu lis patatis!

